

Srećna zbog obnovljene Ferhadije: Sada je ljepša nego prije, krasi cijeli grad

06/05/2016 22:19 by Administrator

Veliki broj Banjalučana i većeras se nalazi u blizini obnovljene Ferhat-pašine džamije svečano otvaranje će biti upriličeno sutra u prisustvu velikog broja gostiju i zvaničnika. Svi se dive ljepoti koja ponovo krasi Banja luku. Među njima je i Taiba Jusić koja živi u banjalučkom naselju Vrbanja.

Â

"Ferhadija je prije bila jako lijepa, a sada je još ljepša. Sad krasi cijelu Banja Luku. Nema ništa ljepše od nje", kazala je Taiba. Sa svojim prijateljicama sjedi na klupi pored obnovljene Ferhadije i pričaju kako će sutra prisustvovati svečanom otvaranju i raduju se zbog ljepote koja ponovo krasi njihov grad.

"Srce mi je puno. Kada je srušena bilo je jako teško. Nisi se osjećao ni dobro niti sigurno. Ferhadija vraća sjaj Banja Luci. Ima ih puno sada u Banjaluci, ali ima još džamija da se prave", poručila je Taiba.

Kako je kazala, Banja Luka je danas ljepša i izgrađenija. Ferhadija je zadužbina Ferhad-paše Sokolovića, izgrađena 1579. godine. Početkom rata u BiH, 7. maja 1993., u potpunosti je srušena, a teren na kojem se nalazila poravnan je u namjeri da se zatre svaki trag ovoj građevini.

Predstavljala je jedno od najuspješnijih arhitektonskih zdanja bosanske arhitekture u vrijeme Osmanlija u 16. stoljeću, a 1950. godine uvrštena je u kulturnu baštinu Bosne i Hercegovine, potom i na listu spomenika svjetske baštine pri UNESCO-u.

Ferhadija je bila jedna od 16 džamija srušenih u Banjoj Luci tokom rata u BiH od 1992. do 1995. godine. Dan rušenja Ferhadije, 7. maj, u Bosni i Hercegovini je proglašen Danom džamija.

Obnova Ferhadije koštala je više od 10 miliona KM, a trajala je oko 15 godina. Dimenzije unutrašnjosti Ferhadije su 12,10 metara sa 12,60 metara, a visina od poda do najviše tačke centralne kupole iznosi 17,5 metara.

S desne strane džamijska zgrade je munara visoka oko 41,5 metara i spada među najviše u BiH.

Izvor vijesti: klix.ba